

蓬

窗

日

錄

蓬窓日錄卷之七

詩談一

太祖高皇帝御製勸世文

爲人在世艱難甚苦時逢亂歲遇遭劫楚天運交
回改朝換宇四海混元圖霸並出張方陳趙明歐
蠻虜元運俱衰總歸

聖主國號大明萬邦拱服英雄豪傑盡滅歸土愧我無
能托賴

宗祖我之道化從運部伍區區獨力五六之數流落他
鄉棄却閭里東蕩西除今御中土亦不能文亦不
能武吾將六旬且男且女謝

天蓋載感

皇水土家道清吉一石之粟量力求財有何不足盟手
虔誠晨香一炷謝罪禳災康泰爲福瓮瓮之衣醜
醜之婦不缺家常無量之福日食三餐夜眠一宿
身安飽暖無量之福安貧守分凡事且足但能隨
緣無量之福身不少衣口不缺祿行夷人敬無量
之福不犯王法身不繫獄一日無事無量之福善
結善緣來疾去速但有一緣無量之福孝子順孫
兄弟和睦居家吉慶前脩之福他有自有我沒自
沒富貴貧窮果得其福實則自欺滿則莫覆但能
如此便是受福酒色財氣只可遠逐有人識破天

堂之福爲官爲吏心莫毒也常行公正久遠之福
直只是直曲只是曲但行平等不必求福爲商爲
賈衣足食足有名無役莫要薄福眼前天堂眼前
地獄積善看經身心念佛

聖君治世便是活佛父母在堂便是活佛
明君勸世天下太平風調雨順五穀豐盈

詩曰

清出源來即是清因緣果報甚分明善惡兩般隨
爾造富貴榮華水上萍新宣大誥欵依念舊頒律
令素條行均能本分安生理保守全家樂太平

太祖賜張以寧詩拜序

以寧字志道
福建古田人

朕聞歷代賢君必有賢臣能事其主者居則規諫
有方出則能示威德以撫四夷漢之陸賈出使於
南越馬援持書於竇融是也朕居江左十有六年
思慕此等之臣終未得至快快於心自即位之初
特遣翰林官知制誥事張以寧典薄牛諒使安南
初未知其懷抱何如去後今年實封來奏朕再三
覽之喜不自勝以寧至彼其王已行長逝彼國人
請授王印於世子我以寧言此吉禮非凶事也今
爾國有喪况來文伊先君之名非世子之名降之
非禮也爾國當遣使往奏庶依大禮於是國人從
之今使者至如以寧實封之言朕思安南僻在外

夷瘴煙甚重古人以爲要荒聖人不居之地賢者
不遊之處恐瘴煙乖其體故耳今我臣以寧抱忠
貞之氣奮古能使之風執之以大義守之以法使
安南復命而後降印又安南國中人民官屬以我
中國揖爲大禮見人衣揖爲禮畢爲我以寧能評
之以禮使彼國中今行稽首之拜觀其所以我以
寧非獨抱忠貞而能役其使者速能化夷行中國
之禮可謂智哉於戲犯忠貞之氣奮守節之剛非
生性之自然歷練老成愚夫猛士可乎使之善者
以寧也綴詩以勉之句雖不聯朕本非儒文之不
深專述其事耳

以寧初使

聞說西南瘴似煙林叢草木有蛇蚊承差不避言君命
自是前賢忠義傳

得以寧實封

嶺南南又海南邊惟有安南奉我天使者往還多議說
瘴雲埋樹若堆煙民人跣足爲鄉禮斷髮衣袍似
野禪話到異方人異處老臣何日得來前

念以寧涉江海

我臣奉命之丹微驛路迢遙渡幾河野宿聽猿啼夜月
朝看狸走疾巖阿風塵未紀何回日取性觀山世
態多晴朗好瞻紅日勝且陰驅逐片雲過離馬乘

舟涉大洋風號帆挂幾尋樞巨鰲聞詔衝前浪
淵底雄鯨翊駕航舵轉水鳴聲霹靂蚌開珠擁海雲
光我臣勁節邀方靖好把丹衷奉上蒼

念以寧入重山

卿初奉命便前奔道路崎嶇實慘魂千尋樹杪猿飛走
萬壑風生瘴氣昏日暮鳥啼人不到月沉象吼夜
還溫何時化作中原地風俗流行禮樂敦使者登
山日進程崎嶇石徑動人情鳥啼深樹聲投耳獸
立幽陰未識名太古以來樵不到至今人徃獸無
驚峯頭一點無科木駐馬觀來四海平

慎言

卿因國事往期年應是朝同世子賢語善久知人道是
話非雖壯遠無邊也知周廟三緘口猶恐臨時不
自然彼處受封王即位但將詩慶便迴旋

戒財

海濱邦國寶多珠勿爲區區化作迂此去爾家豐俸祿
好將方寸向前圖功名千載誠難得一失應須目
下河記得黃金乘夜送四知不納却來誣

保身

莘林江狹水湍流爲問民人是幾秋水色紅黃民性獷
山生巨獸象爲頭我臣至彼還脩養豈被南方瘴
氣愁彼國有人依禮待卿當歸告甚崇優

諭張制誥令世子守服

安南世子性惟賢志行將來必備全初附能尊中國禮
訃音來報朕心憐以寧休作殊邦看萬里神交是
宿緣更把聖書深道與直教素服衣三年

洪武三年四月

日

太祖渡江題詩庵壁僧洗之乃獻詩御筆題詩不敢留
留時只恐鬼神愁曾將法水輕輕洗猶有餘光射
斗牛

太祖皇帝詠菊云百花發我不發我若發都駭殺要與
西風戰一場遍身穿就黃金甲何等英雄氣象

太祖徵時於鳳陽城中遇一遊僧手持小磬號於衆曰

擊磬賣詩聲絕詩就因指鷄卵爲題僧云一塊無
瑕玉中含混沌形忽然成五德叫落滿天星豈僧
爲異人已先知

真主故假以爲兆耳

太祖高皇帝嘗書金華星士劉日新之扇曰江南一老
叟腹內羅星斗許朕作君王果應神仙口賜官官
不要賜金金不受持此一握扇橫行天下走識以
御寶劉持此遍遊天下十二年

有人題康郎山功臣祠云鄱湖鏖戰不生還是我
皇家第一關

聖祖開基天地久將軍正氣斗牛寒義同紀信君臣際

功在張巡伯仲間萬古精忠應不泯白雲明月滿

康山

洪武間御西廡房觀海東青翰林唐肅有詩云雪翮能
追萬里風坐令狐兔草間空詞臣不敢忘規諫却
憶當時魏鄭公可謂善於規諷矣

太祖征陳友諒至鄱陽吳芮廟壁見題竹詩云幽人無
俗懷寫此蒼龍骨九天風雨來飛騰作靈物知爲
胡閩之筆深加歡賞後用爲大理寺少卿閩鄱陽
人號松友直氣不撓

太祖詠雪詩云臘前三白曠無涯知是天公降六花九
曲河深凝底凍張騫無處再乘槎其一統洪基兆

於此

詠新雨詩云片雲風駕雨飛來傾刻凭看遍九垓楹外
近聆新水響遙空一碧見天開其維新丕治於此
見馬

親征漢至瀟湘云馬渡溪頭首蒼香片雲片雨渡瀟湘
東風吹醒英雄夢不是咸陽是洛陽天葩豪宕英
邁讀之竦然

命揚文都督南征詩云大將南征膽氣豪腰橫秋水呂
虔刀雷鳴甲冑乾坤靜風動旌旗日月高世上麒麟
麟終有種穴中螻蟻竟何逃大標銅柱歸來日庭
院春深聽百勞氣象雄豪音律和暢

儒士彭攸信有詩名太祖一日微行指虹詠曰誰將青
紅線兩條無雲無雨繫天腰命渠續之彭即應聲
云玉皇昨夜鸞輿出萬里長空駕玉橋

老儒臨安錢宰公退吟曰四鼓藜藜起着衣午門朝見
尚嫌遲何時得遂田園樂睡到人間飯熟時太祖
曰何嘗嫌汝曷不用憂字

會稽王冕題梅詩云獵獵北風吹倒人乾坤無處不沙
塵胡兒凍死長城下誰信江南別有春

太祖見之大加稱賞

太祖高皇帝常誦唐人李元甫上元詩吟哦不絕其詩
曰南朝天子愛風流盡守江山不到頭總爲戰爭

收拾得却因歌舞破除休老將道德終無敵秦鉞
湯可自由試問繁華何處在雨花煙草石城秋安
不忘危之心也

甘露僧常欽字惟心能讀六經過目不忘戒行精
專

高皇帝率舟師獲偽吳載院判降其衆大閱師拱真庵
師獻詩云天人西來乘赤龍手握寶劍青芙蓉出
師百萬皆英雄四方上下雲相從大船推鼓聲雷
同斬蛟射鯨滄海中須臾日出扶桑東波平浪息
天無風歸來奏凱登九重斯民有賴歌年豐祝
皇壽比南山崇邦基永永傳無窮

金山主僧別峰洪武中赴京慶

萬壽節

高廟

車駕親幸賜詩云命駕雞鳴訪老禪知師昔日住
承天幼年參學心猶切晚歲脩持操愈堅蓮發性
天香馥郁月沉秋水玉團圓一毫照徹三千界何
必藏身北斗邊

高廟駐蹕北固鳳凰池來復見心應制獻詩曰賊寇臨
江口王師出海邊四方喧動地萬姓獨瞻天笳鼓
驚樓鴈旌旗耀戰舡生擒王十士齊唱凱歌旋

臨海趙太守洪武間卒崇太學爲中貴題蚕婦圖云蚕

未成絲葉已無髮雲縹亂粉痕枯宮中羅綺輕如
布爭得王孫見此圖一日

太祖幸中貴宅見之詰問中貴以趙對即召除肇慶知
府在郡有廉聲及歸嘆曰昔趙清猷持一硯今吾
倍之遂持二硯以歸時號趙雙硯

國初象山人錢唐貌魁梧善飲食元末天下大亂隱
而不見年將六旬見四海定於一赴京敷陳王道
先獻一詩其詩曰

大明洪武元年春春雷一聲天地響

龍飛在天雨如膏大地山河增氣象山人昔往東海山
山形如象山名丹丹山之南有白石山人隱遁松

林間一朝陰氣蔽白石天昏地暗人變顏人人變
顏鐵黑山人鐵心仍鐵肝山人名不掛唇齒山人
不與人相似吳江江上吳山青吳山有城高百雉
好風吹步上京師鐵杖麻鞋見

天子天顏悅懌天開明謹身殿中承

聖旨致君堯舜端有特山人事業當如此詩既稱

旨授刑部尚書明年己酉條孟子節文歌去其配饗即

上疏先是有

旨來諫者當射殺之唐果置棺袒曾當箭上見其諫甚
切命太醫院療其箭瘡配饗得不廢成化初我先
大父南山先生作四月八詠有錢丈奇勛之詩曰

引棺絕粒箭雷貫拚死扶持亞聖公仁義七篇文
莫蠹冕旒千載繪仍龍批鱗旣奮回天力沒蔭終
成衛道功那得

洪恩徧寰宇泮宮東畔置祠宮

太祖皇帝一日觀新月時諸皇子在侍皆命作詩詠之
東宮詩云昨夜嚴陵失釣鈞何人移上碧峯頭雖
然未得團圓象也有清光照九州時建文君年尚
幼詩曰誰將玉指甲搥破天上痕影落寒潭底魚
龍不敢吞

太祖皆不懌

世傳逸詩爲建文君所作詩云流落江湖四十秋蕭蕭

白髮已盈頭乾坤有恨家何在江漢無情水自流
長樂宮中雲氣散朝元閣上雨聲愁新蒲細柳年
年綠野老吞聲哭未休

文廟起兵靖內難帷幄之功惟姚少師廣孝姑蘇人初
爲僧於北平仰山寺名道衍字斯道歲壬午靖難
功成反初復姓名曰廣孝是名也蓋因元世祖時
有僧曰聰書在慶壽寺世祖召見所言稱旨授以
官復其姓名曰秉忠位至太保即元史劉秉忠也
姚因秉忠故名廣孝位亦至少師吁一忠一孝皆
官公孫遜佛入儒有如此人之出處豈可決哉

建文君嘗有詩云是日乘輿看晚晴葱葱佳氣滿金陵

禮樂再興龍虎地衣冠重整鳳凰城人以爲文皇
識也

解縉應制題虎額衆處圖曰虎爲百獸尊誰敢觸其怒
惟有父子情一步一回顧

文皇感此詩即日命夏原吉迎仁宗于南京非縉諷諍
之力歟

山陰劉子華工詩詞以明經薦開平王常遇春薨

太祖命賦挽詩子華承詔少選而成曰揮戈十載定河
山忽報星沉易水灣馬首西風旌旆捲天溼落日
凱歌還功成楚漢興亡際名在韓彭伯仲間聖主
思功心獨苦黃金直欲鑄真顏大稱旨

金華張公尚禮洪武間拜監察御史爲人瘦小人以鬼
臉張呼之一日作宮怨詩云庭院沉沉晝漏清閑
門春草共愁生夢中止得君王寵却黃鸝叫一
聲

聖祖以其募寫宮闈心事下蚕室而死

仁廟在東宮觀奕詩云二國爭強各用兵擺成隊伍定
輸贏馬行曲路當先道將守深宮戒遠征乘險出
車收敗卒隔河飛砲下重城等閑識得軍情事一
着功成見太平何等機畧雄偉曾子縻先生應制
云兩君對敵立雙營生運神機決死生十里封疆
馳鐵馬一川波浪動金兵虞姬歌舞悲垓下漢將

旌旗逼楚城興盡計窮征戰罷松陰花影滿殘枰
君臣器局見矣

宣德六年辛亥勅曰朕惟賢者致治之具肆即位以來
屢詔有司舉德行才智之士將與共圖治道然林
泉巖谷必有遠引而不輕出者朕夙夜念之不能
已也夫狂已求售非忠士之本心而潔身獨善豈
聖賢之中道故嘗作招隱之歌欲使幽遠之賢皆
明朕志庶幾翻然有奮起者蓋昔人嘗賦招隱矣
彼其有激欲與俱去避世遺人一己之私朕之所
懷天下之公題雖同而志則異觀者亦亮予之志
焉耳卿等爲國重臣同朕欣歲宴樂之歡持示觀

之夫舉賢爲國人臣之忠其必有以勉副斯意勿
徒視爲空言可也歌曰吾觀天地化育功四序五
行實任之軒轅堯舜致熙皞亦有六相兼臯稷若
臣共濟自往古大廈豈是一木爲况予涼薄資九
五承大寶四海之廣兆姓繁側席仁賢翼王道長
林大澤高丘巨壑豈無懷抱材德者蕭散幽閑樂
其樂扣舷清溪弄綠水結巢雲松招白鶴雲松蒼
蒼白鶴飛翠蘿搖曳春風時朝饒黃獨夕茹紫芝
放歌考槃什吟咏梁甫詞如玉在璞韜其輝天之
生才將有爲豈徒獨善而無施彼不輕施吾當致
之屢下求賢詔明珠寧無遺中夜有懷起待旦勞

心咨求志日冥嗟爾賢人何樂空谷有莘幡然起
猷敵儔巖何嘗終版築磻谿白首還膺揚卧龍亦
復興南陽旱歲人間望霖雨大川利涉需舟航嗟
爾賢人無爲徘徊石泉麋鹿非爾伍風雲天路爲
爾開脫却芟荷衣掛在青崖隈翩翩並駕蒲輪來
黃金如山築高臺待爾爲咏臺與萊母爲令我悵
望思難裁

十二月辛巳又製喜雪歌勅曰臘後五日之夜大雪迨
旦而霽蓋豐年之祥也因作喜雪之歌與群臣同
樂之已命光祿賜宴其悉醉而歸歌曰一冬晴明
人不厭臘月雪飛尤所喜從古農占重三白來年

有秋預可擬今年初春始而當已見農穡連遠邁
况當嘉平越五日遇雪相語能已昨夜長風廣
莫未號空撒地初停雷斯須漫漫撒玉屑千樹高
樹梅花開大地平鋪皆一色光輝未數瓊瑤白
山蒼翠不可尋但見凌虛聳銀壁憑高四顧真奇
觀日上扶盃朝不寒乾坤萃和作祥瑞滿目欣愉
增意氣昔人勞農享臘惟此時更說來年豐有期
村村腰鼓聽宴飲庶幾時平今見之嗟予菲德臨
九五變理功能寄丞輔舉觴相樂拜

天庥永念

皇天與

皇祖

宣廟詩多大言如史館云蕩蕩堯天四表巍巍舜德重
華祖考萬年垂統乾坤六合爲家上林春色云山
際雲開曉色林間鳥弄春音物意皆含生意天心
允合吾心撒扇一首云湘浦煙霞交翠剡溪花雨
生香掃却人間炎暑招回天上清涼其詩皆以天
地萬物爲一體此真帝王之言也

孝宗賜蜀昭王詩云河間禮樂文風盛江夏忠勤世業
昌異代豈能專美事吾宗亦自有賢王獨卿何幸
得之

孝廟弘治元年御又華殿講書畢賜講臣各織金緋衣

金帶及紗帽烏鞞叩頭謝訖上曰先生辛苦成對
曰此職分當爲皆頓首而退程敏政有詩記之曰
日映杲恩曉殿深湛恩稠疊

駕親臨袞衣紅耀天機錦束帶黃分內帑金久辛
清班容宦履老慚華髮點朝簪經生職分尋常事
消得

君王念苦辛

李文正公懷麓續稿五月七日

泰陵忌辰詩云

秘殿深嚴

聖語溫十年前是一乾坤孤臣朽壑餘生在

帝里金湯舊業存

舜殿南風難解愠

漢陵西望欲銷魂
年年此日無窮恨
風雨瀟瀟獨閉門
讀之不能不使人掩卷流涕
鄭少谷上恭陵詩云
千林松檜鬱相迴
永夜風生瀚海哀
萬國昔曾瞻氣象
五雲空復護崔嵬
古來鳳鳥長難至
天上龍髯定不回
苦憶焚香賜第日
報恩真愧濟時才
蓋恭陵乙丑科在宮中焚香祝天云
願得賢才以輔太平
故少谷云云是年得人爲盛
至今彼澤嗚呼帝德可及哉

成化丁酉之冬無雪

上憂厯給事中馬中錫疏劾巨璫尚路李榮聲勢相倚
朝紳依附

上得疏凡一應斜封墨敕人員俱從罷黜次日遂大雪
大學士楊守陳作詩紀事馬公次韻曰一冬氛氣
暖重重年盡冰花馭朔風官道白從今日始群山
青滅舊時濃白綠

明主回天意不獨貧民兆歲豐我亦有樓高百尺曉來
登眺快元龍

唐明皇劍門關詩云劍閣橫空峻鑿輿出狩回翠屏千
仞合丹嶂五丁開灌木縈旗轉仙雲拂馬來乘時
方在德嗟爾勒銘才是詩英華及諸唐詩皆不載

故記于此

梁簡文帝春情曲云蝶黃花紫燕相追揚低柳合踏塵
飛已見垂鈎掛綠樹誠知洪水霑羅衣兩童夾車
問不己五馬城南猶未歸鶯啼春欲駛無爲空掩
扉此詩似七言律而未句又用五言王無功亦有
此體又唐律之祖而唐辭瑞鷓鴣裕韻似之

宋武帝丁都護歌云都護北征時儂亦思聞許願作石
尤風四面斷行旅又云都護北征去相送落星墟
帆檣如芒裡都護今何渠唐人用丁都護及石尤
風事皆本此二辭絕妙宋武帝征伐武畧一代英
雄而後風致如此其殆全才乎

唐憲宗朝北狄寇邊大臣議和親帝曰聞有士子能言
姓名稍僻朕記得詠史一篇云漢家清史內計拙
是和親社稷因明主安危託婦人豈能將玉貌便
欲靜胡塵地下千年骨誰爲輔佐臣大臣知爲戎
星之詩和戎之議遂息

昔宋太祖微時有詠初日詩云太陽初出光赫赫千山
萬山如火發一輪頃刻上天衢遂退群星與殘月
一云欲出未出光赫赫千山萬山如火發須臾走
向天上來趕却殘星趕却月氣象剛質後頭詩皆
潤色耳蓋宋以火德王天下及登極削平僭竊混
一寰宇之志先形於言規模宏遠矣又有詠月詩

未離海底千山暗繞到天中萬國明大哉王言撥
亂反正見於詩如此

宋真宗題內香藥庫云每歲沉檀來遠裔累朝珠玉實
皇居今辰內府初開處尤宜史筆書其侈心
之萌有自矣

真宗幸鄭州召處士楊朴欲官之問卿來時有以詩送
行乎朴知帝意謬云無有只臣妻一篇使誦之曰
更休落魄貪杯酒更莫猖狂愛作詩今日捉將官
裏去這回斷送老頭皮帝大笑賜束帛還山

宋高宗題紅色木犀花云月宮移就日宮裁引得輕紅
入面來好向煙霄承雨露丹心一點爲君開又云

秋八幽岩桂影圓香深粟粟照林丹應隨王母瑤
池宴染得朝霞下廣寒

湖州徐神翁獻詩宋高宗曰牡蠣灘頭一艇橫夕陽西
去待潮生與君不負登臨約同上金鰲背上行及
兩宮北狩高宗航海次臨海章安鎮候潮金鰲山
牡蠣灘登福齋寺此詩在壁間題墨尤新

宋徽宗在北虜清明日吟曰茸母初生認禁烟無家對
景倍凄然帝城春色誰為主遙指鄉關涕淚連茸
母草名北地寒食則茸母草生爲君者至於身爲
臣虜視草之榮而訂節可不爲萬世之愴嗟耶

寄語林和靖梅花幾度開黃金臺下客應是不歸來此

宋幼主在京都所作也二十字無限凄楚之意

直北有宋道君題壁詩云徽夜西風撼破扉蕭條旅館
一燈微家山回首二千里目斷天南無鴈飛

聶碧窓題趙太祖真容扇表龍姿儼若新一回展卷一
傷神天顏亦恠君非魯河北山東摠舊臣

宋徽宗書七言于扇云選飯朝來不喜餐御厨空費八
珍盤命一太學生注之生即續云人問有味俱嘗
適只許江梅一點酸注書進大喜是生亦可謂調羹
手段

有降于紫姑仙叩其姓名不答忽作薛稷體大書一詩
云星冠玉帶落邊巾注幾見東風作好春回過江南

省宗廟眼前誰是舊京人捧箕者悚然知爲淵聖
在天之靈也

宋高宗嘗作詩賜統制劉漢臣云野水參差落漲痕跡
林欹倒出霜根扁舟一棹向何處家在江南黃葉
村今勒石杭之潮鳴寺又作漁父詞云薄晚烟林
淡翠微江邊秋月已明暉縱遠柁適天機水底閒
雲片段飛又云青草開時已過船錦鱗躍處浪痕
圓竹葉酒柳花蘊有意沙鷗伴我眠又云水涵微
影湛虛明小笠輕蓑未易晴明鏡裏縠紋生白鷺
飛來空外聲詞致清遠詞人莫及然規模偏安志
氣柔媚亦可見矣耽樂湖山無復新亭之淚有士

人林升題旅邸云山外青山山巒西湖歌舞幾時休
暖風薰得遊人醉便把杭州作汴州又有人題朝
京路經云白塔橋邊賣地經長亭短驛甚分明如
何祇說臨安路不數中原有幾程君相偏安亦可
慨夫神州竟不恢復咎誰執之

宋徽宗北隨金虜後見杏花作燕山亭一辭云裁剪冰
綃輕疊數重冷淡燕脂注新樣靚妝豔溢香融羞
殺蓋珠宮女易得凋零更多少無情風雨愁苦閒
院落淒涼幾番春暮憑寄離恨重重雙燕何曾
會人言語天遙地遠萬水千山知他故宮何處怎
不思量除夢裏有時曾去無據和夢也有時不做

辭極淒惋亦可憐矣

大和九年誅王涯鄭注後仇士良專權恣意文宗惡之
或登臨遊幸不以爲樂往往性瞠目獨語左右莫敢
進因題詩曰輦路生春草上林花滿枝馮高何限
意無復侍臣知上於內殿前看牡丹翹足憑欄忽
吟舒元與牡丹賦云俯者如愁仰者如語合者如
咽吟罷嘆息良久泣下沾臆嗚呼宦官之橫致君
如此可不成履霜哉

唐文皇過舊宅詩曰新豐停翠輦譙邑駐鳴笳一朝辭
此去四海遂成家是何等功烈

唐宣宗微時省迹爲僧與黃蘗禪師觀瀑布泉師詠云

千岩萬壑不辭勞遠看方知出處高宣宗接下韵
云溪澗豈能留得住終歸大海作波濤其後竟踐
大位然接懿喜之時宇內不靖其作波濤之讖耶
有人題秋胡詩其一曰卽恩葉薄妾永清卽說黃金妾
不磨若使偶然通一笑半生誰信守孤燈其一曰
採桑樹下說黃金料得秋胡用計深不是別來渾
未識黃金聊試別來心二詩各有寄意見不同也
會稽王冕元章白題畫梅云我家洗研池頭樹箇箇花
開淡墨痕不要人誇好顏色只留清氣滿乾坤
一僧自題覺影云汝卽吾兮吾卽伊汝心惟有我心知
百年吾若登仙去留汝人間作表儀

王柳庵歸泰和有數落花詩云寂愛東園桃李花可堪
飄蕩委泥沙人生榮謝皆如此不用臨流起嘆嗟
咏春雪云東風萬樹發青條信宿都隨雪色彫惟有前
林松與柏依然蒼翠拂雲霄

長洲劉詹事先生宗器送同官之任南京詩云一尊傾
罷兩蕭蕭客思離情總不消十載禁林同侍講五
更青瑣共趨朝西風鴻鴈南歸急落日雲烟北望
遙此際送君無限意踈踈揚柳玉河橋

有人作鳩吻詩獸頭元是一團泥做盡辛勤誰不知如
今槿在青雲裏忘却當初窰內時

有題蘓李泣別圖云我生自恨不如死君死誰知更得

生十九年前今日淚都無一滴爲功名

有題趙松雪寫陶元亮圖文章撐住晉乾坤三選清風
宛若存何事揮毫松雪老不知芳草怨王孫

唐章碣題焚書坑云竹帛烟銷帝業虛關河空鎖祖龍
居坑灰未冷山東亂劉項元來不讀書

唐僧澹交題寫真云圖形期自見自見却傷神已是夢
中夢更逢身外身水花凝幻質墨採聚空塵堪笑
余蕪爾俱爲未了人

宋康輿之書宣和畫扇一絕云玉輦宸遊事已空尚餘
奎藻繪春風年年花鳥無窮恨盡在蒼梧夕照中

王叔能參政過錢清鎮劉寵廟云劉寵清名舉世傳至

今遺廟在江邊近來仕路多能者也學先生棟大錢

天台陳剛中仕元禮部郎中使交趾詩云老母越南垂白髮病妻塞北倚黃昏蠻烟瘴雨交州客二處相思一夢魂

同麗宋端拱後不入貢王微立一夕夢至汴京宣召觀燈爲詩識之曰宿業因緣近契丹一年朝貢幾多般忽蒙舜日龍輪召使侍堯天佛會觀燈焰似蓮丹闕迴月華如水白雲寒移身幸入華胥境可惜終宵漏滴殘神宗時復修故事來朝可謂夢寐不忘中華

王元之兩貶還朝不能無怏怏時張齊賢李沆當國以詩投之曰早有虛名達九重宦途流落漸龍鍾散爲郎吏同元積羞見都人看李邕舊日謬吟紅藥樹新朝曾獻皂囊封猶祈少報君恩了歸去山林作老農然亦竟坐張相不悅又有黃州之遷

岳武穆至金山僧道月送之登舟囑云風波亭下浪滔滔千萬留心把舵牢謹備同舟人意及將身推落在波濤又曰將軍此去莫心焦未審金牌氣怎消滾滾風波須仔細牢心把舵要堅牢秦檜杲陷飛於風波亭下

岳武穆死後降箕書其花押宛然平日真迹一絕云經

畧中原二十秋功多過少未全酬丹心似石今誰
翹空有遊魂徧九州秦相聞而治之死者數人

岳武穆墨蹟嘗見閩人持岳武穆詩一軸蓋從駕遊西
內應制詩也其云勅報遊西內春光藹上林花團
千朶錦柳撚萬條金燕遶龍旂舞鶯隨鳳輦吟君
王卽天地化育一仁心字体徑可五尺題名岳飛
印章鵬舉模雙鉤者亦高手爲之也其真蹟在閩
中陳氏惜不獲觀

元末有曰全真先生言輒驗云此後當改至元至元後
改至貞天下亂矣是時有人大書于御史臺門曰
苞苴賄賂尚公行天下承平恐未能二十四官徒

獬廌越王臺上望金陵

予乙巳家食見賑饒之吏不以恤民爲心正所謂非徒
無益而反害之暇因讀袁介踏灾行子錄一通彼
奇吏者不惻然可謂無人心矣辭云有一老翁如
病起破衲毳毳瘦如鬼曉來扶向官道傍哀告行
人乞錢米時予捧檄離江城邂逅一見憐其貧倒
囊贈與五升米試問何故爲窮民老翁答言聽我
語我是東鄉李福五我家無本爲經商只種官田
三十畝延祐七年三月初賣衣買得犂與鋤朝耕
暮耘受辛苦更還租債輸官租誰知六月至七月
雨水絕無潮又竭欲求一點半點水却比農夫眼

中血滔滔黃浦如溝渠農家爭水如爭珠數車相
接接不到稻田一旦成沙塗官司八月受灾狀我
恐徵糧獎官棒相隨隣里去告灾十石官糧望全
放當年隔岸分吉凶高田盡荒低田豐縣官不見
高田旱將謂亦與低田同文字下鄉如火速逼我
將田都首伏只因嗔我不肯首却把我田批作熟
太平九月開旱倉主首貧乏無可償男名阿孫女
阿惜逼我嫁賣陪官糧阿孫賣與運糧戶即日不
知在何處可憐阿惜猶未笄嫁向湖州山裏去我
今年已七十奇饒無口食寒無衣東求西乞度殘
喘無因早向黃泉歸旋言旋拭腮邊淚我忽驚慚

汗沾背老翁老翁勿復言我是今年檢田吏

編脩楊守陳賦銀豆謠曰尚方承詔出九重治銀爲豆
驅良工顆顆勻圓奪天巧朱函進入蓬萊宮御
手親將十餘犯琅琅亂灑金塔下萬顆珠璣走玉
盤一天雨雹敲鴛瓦中官跪拾多盈袖金襴半墮
羅裳縞羸得天顏一笑懽拜賜歸來坐清晝聞知
昨日六宮中翠娥紅袖承春風黃金作豆競拾得
羊車不至愁煙空別有銀壺薄如葉并刀剪碎盈
丹匣也隨銀豆灑金塔滿地春風飛玉蝶君不見
民餐木皮和草根夢想豆食如八珍官倉有米無
銀糴採甄畫作溝中瘠明主由來愛一頓安邦只

在恤窮民願將銀豆三千斛活取枯骸百萬人

元李存義役謠云八都安仁最下都易水易旱生理無
奉公徃役名主首半是摘葑擔柴夫或因苗麥僅
升斗遂忝放實元空虛千中得一稱上户土赤繆
當辰砂朱五更飯罷走盡卯水潦載道歸來哺天
下未平諸鎖碎每以附近先供需課程茶酒罕陪
備所取盞米何錙銖逃糧逃金不待論職田子粒
尤難輸公家督促過星火唯聽搖撻生虫蛆幾年
辛苦垓容蟻一界了畢鍋遊魚問逢賢宰相憐恤
蘇息無術空嗟吁省符郡帖一朝下義遜得許從
鄉間徐君更是好義者率以公正人爭趨同時共

數君子但有贊協無容且出多出少由厚簿若小
若大皆權愉支吾縱廣非獨力傾助能幾咸安居
移東走西幸免矣那上趨下歸誰歎不聞墮突到
雞狗但覺和睦安犁鋤願依此舉更堅久美事無
以三年拘

淘金行元稹明詩云淘金大江側水深沙淺淘不得夜
聞呼叫來打門官司追課如追魂呼童挑燈取金
看囊中祇有分毫積課多金少輸不及里管怒嗔
徐見執賣金買寬限金盡限轉急歸來坐窓下妻
子相對泣泣亦徒爾爲輸官不在遲南庄有田仍
可賣莫遣過限遭鞭笞獨不見西家賣金仍賣屋

戶戶通金猶不足

且將世味濯瀟湘
贏得清高似太常
一寸自存心上赤
二毛不管髮邊霜
守官媿我金爲帶
怯酒從渠玉作觴
何日粗酬公事了
一江秋水送歸航
半江居士題于懷
化釋不知是誰也
亦可玩耳

顧味厓出臣不第詩云姊妹年來各有家
錦屏繡褥園奢華自憐薄倖難爲侶
歸去床頭學繡花
耗物比興得實耳

有一女子未嫁而夫死
葬日至墓所自縊焉
時撫按俱徃
弔御史有詩云
未親夫面繼夫亡
不比尋常女
子行白髮尚難操
晚節青年誰肯棄
秦光魂遊碧

落乾坤漲名入青山草木香我淚豈能容易出與
伊千載寄綱常

長沙陳思魯名論爲母求節婦卷詩自作詩云共妾阿
母可同儔我母何曾讀栢舟一點丹心隨父死半
生殘喘爲孤晉啼多血淚花生眼歷盡米霜雪上
頭借重一言承萬古隻親不負老荒陬

有人有女及笄更不置一物其人善畫止作舉茶齋眉
圖一幅題一詩手携其女以適其夫詩云婚姻幾
見闔奢華金屋銀屏衆口誇轉眼十年人事變粧
奩賣與別人家可謂識時知機矣

蔡選善畫葡萄號霜鶴人以蔡葡萄呼之工詩其登黃

鶴樓云一上高樓眼界賒乾坤清碧浩無涯水邊
突出群山小天外飛來一鴈斜淑氣已將回造化
好風竟不起塵沙闌干十二都凭遍四海而今摠
一家登高云咲取青蚨信手拋呼兒沽酒壯詩豪
鬢邊白髮難欺我籬下黃花不姓陶大別也應如
此大龍山未必不多高醉餘直至風顛處舞破江
南老布袍

廣東一寺爲人所圖其僧即抽單而去遺詩云慙慙收
拾舊袈裟檢點行囊沒半步袖拂白雲辭古寺杖
挑明月上天涯最憐松頂新巢鶴還憶籬邊昔種
花分付犬猫隨我去免教流落野人家

丘文莊公十三歲時題五指山詩云五峯如指翠相連
撐出浮洲半壁天夜與銀河摘星斗朝探碧落弄
雲烟雨餘玉笋空中現月出明珠掌上懸猶似巨
靈伸一臂遙從海外撫中原不但詠物得體何等
氣象又題紅指甲云金鳳花開血色鮮佳人故染
指尖丹搗箏亂落桃花片把盞斜排玳瑁班拂鏡
火星流夜月畫眉紅雨過春山有時閒托香腮立
疑是春風點玉顏句雖洒麗亦不失體二詩盖用
洪武韻也

有人詠箬衣詩云輭綠柔藍着勝衣倚舡吟釣正相宜
薰葭影裏和烟卧菡萏香中帶雨披狂脫酒家春

醉後亂堆漁舍晚晴時只饒紫綬金章貴未肯輕
輕博換伊

有詠傘詩云萬骨攢來一柄收街頭日日旱諸侯幾番
撐向馬前去真箇有天沒日頭語雖俗而味可取
王感寧詩云歸去來兮歸去來千金難買釣魚臺已知
世事只如此借問古人安在哉白髮有情容我老
黃花無主爲誰開平生報國心如火一夜西風化
作灰詩雖可觀而心如火化作灰是何言哉人雖
客氣而逢迎於權宦之門亦管仲之器也

王陽明詠傀儡詩云處處相逢是戲場何須傀儡夜登
堂繁華過眼三更促名利牽人一線長釋子自應

通鑑卷之二十一
爭詫說倭人亦復浪悲傷本來面目還誰識且向樽前學楚狂佳作也

酸齋買學士題蘆花被詩云採得蘆花不沈塵翠簑聊復藉爲裯西風刮夢秋無際夜月生香雪滿身毛骨已隨天地老聲名不讓古今貧青綾莫爲鴛鴦妬款乃聲中別有春亦大手也

錢唐劉士亨哭其師王志道詩云十年負友遊門下愛我翻於骨肉輕才劣豈宜居弟子恩深何以報先生春風夢斷行柯墜暮雨啼殘隔葉鶯賴有詩家衣鉢在後來誰起繼芳聲師弟子之情藹然可見矣

劉士亨有詠猫絕句云口角風來薄荷香綠陰庭院醉
斜陽向人只作猙獰勢不管黃昏鼠輩忙語涉訕
刺幾不能堪不若劉潛夫詩云古人養客乏車魚
今爾何功客不如食有溪魚眠有毯忍教鼠噬案
頭書語稍含蓄而督責亦露不若陸放翁詩云裹
鹽迎得小狸奴盡護山房萬卷書慚愧家貧策勲
薄寒無毯坐食無魚庶乎厚施薄責而報者自愧
矣又無若劉伯溫詩云碧眼烏負食有魚仰看蝴
蝶坐階除春風漾漾吹花影一任東風鼠化鴛真
可謂豁達涵容法禁不張而姦宄自化信乎王佐
之才也

林和靖雖隱居而亦以豪放玩世故當時頗有不足之
者其詩云道着權名便絕交一峰春翠濕銜茅莊
生已慣鴟爲嚇揚子休譏螻蟻嘲滴滴藥泉來石
竇霏霏茶竈出松稍琴僧近借南薰譜且併閑工
子細抄閑搭綸巾擁縹囊此心隨分識興亡黑頭
爲相雖無謂白眼看人亦未妨雲噴石花生劍壁
兩畝松子落琴牀清猿幽鳥遙相叫數筆湖山又
夕陽其玩世之態可想見矣

揚震四知臺在昌邑縣薛文清公詩云人間無處不天
公却笑黃金餽夜中千載四知臺下過馬頭猶自
起清風

前人選唐詩以鍾離洞賓二絕句爲難得恨不多見今
之唐詩正聲並削去蓋以爲異端之言也不取是
誠何心哉錄出以備金剛眼爲何如鍾離云黃鶴
樓頭吹笛時白蘋紅蓼滿江湄裘情欲訴無人會
只有清風明月知洞賓云草鋪橫野六七鯉弄晚
風三四聲歸來飽飯黃昏後不脫蓑衣卧月明鍾
離漢人名權非鍾離昧也

蜀三月羊宮有道人以箒蘸墨塗壁而去人洗之見有詩
云仙境閑尋採藥翁草堂留語數宵同要知山下
雲深處只是人間路不通泉引藕香來洞口月將
松影過溪東末名心在閒難遂明日馬啼塵土中

後題三清茶吏玉皇舉人寒仙子書人疑爲白玉
蟾云

篔簹真人詩云道法於人不等閑每思戒行骨毛寒千年
鐵樹開花事一入鄧都出世難學道者可不懼歟
葛蘭賓隱居養母以孝聞高文毅贈以詩云烏紗巾子
鹿皮冠林壑幽栖若謝安百歲慙勤惟奉母一生
瀟洒不求官淮鹽海錯常供饌野杏山桃屢薦盤
架上有書尊有酒老年心事足清歡蘭賓泰州劉
莊人也

刁約使契丹戲爲四句詩曰押燕移離畢看房賀跋支
錢行三匹裂密賜十貔狸皆紀實也移離畢官名

如中國執政官賀跋支如執衣方閣匹裂小木盟
以色綾木爲之如黃漆貌狸形如鼠而大穴居食
果穀嗜肉狄人爲珍膳味如狍子而脆

松窓居士黃榮祖詠宋十八帝各一律辭簡意盡太祖
云五季生民厭亂離陳橋兵變更何疑不因大志
生平有安得天文頃刻知分痛灼肌敦友愛圍爐
呼嫂廣恩私榻前豈可容射睡燈下堪憐好做時
太宗云虎步龍行亢厥宗指橋一定下河東武功
自殺涪陵貶多遜流崖趙晉功海宇雖然沾德澤
彘倫可惜欠淳風嶺南馮拯緣何斥有媿遺言自
熱中真宗云承天鴟尾得天書本欲愚民實自愚

不是君王耻，孤注誰教冢宰受明珠。史稱景德多
賢相，我惜祥符問腐儒。李迥一言能感悟，不推儲
位寔良圖。仁宗云：仁廟臨朝四十年，深仁厚澤古
無前。攘夷雖未收，靈夏愛物何曾愧。老天白壁微
瑕嗟廢后，紫宸端拱喜傳賢。一時英俊咸登用，始
養邦基豈偶然。英宗云：叩額析安母后慈，治平功
在撤簾時。濮園誰是歐公議，章獻惟應魏國知。天
不假年良史惜，政多法古後人思。可憐力疾書名
日，彥博寧無退後辭。神宗云：堯舜何嘗不畏天，一
言誤主禍基連。君王尚不知民隱，禽鳥猶能得氣
先。鄭俠奏圖仍不悟，岐王泣諫亦堪憐。屬精求治

渾無取只有斯文獲正傳哲宗云女中堯舜有微
稱苦惜群賢各黨朋一自調停來社鼠遂令紹述
集庖螻慢嗟善政無終始更惜丕圖錯繼承若也
申王無目青不須高廟作中興徽宗云道君皇
帝厭楓宸欲學神仙出世塵不識蔡京真巨賊妄
憑童貫作謀臣舊隣未遂開疆計新國先成入寇因
誰遣神君催納土不知納土與金人欽宗云靖康
天下已堪傷不把權衡付李綱只聽愚庸主和議
豈知忠義欲勤王金銀盡括還無益社稷南遷實
自亡却悔不從師道語青城山下解龍裳高宗云
忍忘不共戴天讐且得偷安浙水頭早以汪黃作

房杜晚將檜戍比伊周千年遺恨朱仙鎮九廟孫
魂古汴州徒步南陽果何者能令六合復炎劉孝
宗云太祖傳來七世孫力圖恢復舊乾坤孝親已
見無瑕翳治國猶看識本根自倚魏公殲巨敵豈
知湯相黨秦門重華一入誰溫清笑殺光宗惑婦
人光宗云能用危言起帝疑遂令人子孝情虧乳
鷄司曉家惟索孽后專朝國亦危斷腕宮嬪果何
罪引裾宰相欲奚爲汝愚他日簾前議大定人心
却賴誰寧宗云夢卜求賢三代聖私恩進用後王
非共知佐甯能傾國誰識徐誼早見幾邊鄙頻聞
兵敗績朝廷更遣使求祈可堪西北添新國從此

凌夷宋祚徵理宗云廟號那能謚理宗闡明吾道
帝之功人比自有願殲彌遠天獨何心罷了翁上下
偷安時政弛邊隅失利國基窮中年嗜慾福淺進
僅得從容保令終度宗云天王降禮貶春秋奸賊
那須泣拜留千古罪人能自覺十年庸主不為愁
慢將酒色耽嬉樂却把忠良作寇讐六載襄陽圍
不解江南王氣自茲休孝恭云奸臣竊命已三朝
幼主臨民國祚搖立信有謀言不聽宜中無伎弔
難調二王如婺人心在太母降元帝荼銷太祖有
靈應自笑不須容易說陳橋端宗云黃幄頻爲海
嶺移三閩四廣孰先知忠臣死國真無愧幼主臨

戎更可悲拜相尚求張世傑禦兵須用李庭芝當年似道專朝際應妬群賢共一時帝昺云濱死孤臣可柰何手擎日月赴清波趙家自嘆乾坤窄弘範初矜戰艦多元社百年今寂寞忠魂千古不銷磨平章山下無情水猶似當年發怨歌

常見人家所貼四心字各贅四句言雖鄙而意雖淺深可爲愚人易省姑錄之其寫一正心字云若用此等心何須去念經自然家道富代代子孫興覆心字云若用此等心機謀害殺人時時遭王法荼盡禍臨身側心字云若用此等心妻子不相親浪蕩東西走混沌過平生三心字叢一處云三心共一

心心心都在人但行平事不必問前程予亦效
製其一以一心字中一點落下題云萬事由天定
何須用意深干己不干己都且放下心不覺自發
一笑

李完者荆才子也任陳留尹未第時在一友家觀請紫
姑仙箕動衆叩姓名書曰介甫完知爲安石也遂
發一咲箕即書一詩曰李完咲我當時事新法而
今我自痴堪咲史官何太貶晦翁方是半相知或
聰明之鬼而假名耳

王鉞雲中即事詩曰二月山城雪尚飛年年草色見春
遲不知上國閑桃李開到東風第幾枝

王鉞雲中中秋感懷曰瑟瑟西風秋雨晴可憐佳節在
邊城百年人有幾時健一歲月惟今夜明撫劍不
堪傷往事舉杯空自惜離情

君恩未報頭先白贏得棘門說老成

郭登中秋感懷曰南極烽烟又遠征衣冠今夕會邊城
千家落木傷秋色萬里歸心對月明舞鏡彩綵雲
渺渺隔簾霜兔杵丁丁九霄風露涼如洗期挽天
河洗甲兵文臣武將之意見矣

于少保謙雲中書所見曰目極烟河草帶霜天寒歲暮
景蒼茫炕頭熾炭燒黃鼠馬上彎弓射白狼上將
親平西突厥前軍近斬左賢王邊城無事烽塵靜

坐聽鳴笳送夕陽

雲南梁王遭明玉珍之寇總管段功為追逐之王深德
段功以女阿璫妻之功自是威望大著後王疑而
殺之其妻愁憤作詩曰吾家住在鴈門深一片閒

雲到滇海心懸明月照青天不語今三載

隨明月到蒼山恨我一生路裏彩

段阿奴姓阿奴施宗施秀同奴歹歹不雲片波

不見人押不蘆花顏色玫起死回生肉弄獨

坐細思量山西山鐵立霜瀟灑鐵立其從

官員外揚洲海挽詩云半紙功名日戰身不堪今

日總紅塵死生自古皆由命禍福于今豈怨人朝

蝶夢殘滇海月杜鵑啼破點蒼春哀憐永訣雲南
土錦酒休教灑淚頻詩竟亦飲藥而卒後功之子
段寶符爲總管據大理梁王復遭玉珍之侵借兵于
寶實荅詩云烽火狼煙信不符驪山舉戲是文吾
平章枉喪紅羅帳員外虛題粉壁圖鳳別岐山得
兆隱麟遊郊藪瑞光無自從界限鴻溝後成敗興
衰不屬吾功之妹僧奴適阿黎氏遺寶令後阮詩
云珊瑚勾我出香閨滿目潸然淚濕衣水鑑銀臺
前長大金枝玉葉下芳菲烏飛兔走頻來往桂馥
梅馨不暫移惆悵同胞未忍別應知含恨點蒼低
何彼穠穠花自紅歸車獨別洱江東鴻臺燕苑難

經目風刺霜刀易塞霄雲舊山高連水遠月新春
疊與秋重淚珠恰似通宵雨千里關河幾處逢此
數詩雖非大家然見窮荒婦女亦知文墨云

人之所夸與所仰慕皆不出本等唐杜牧詣僧僧不識
人言其名亦不省故詩云家住城南杜曲傍兩枝
仙桂一特芳山僧都不知名姓始覺空門興味長
因爲之語云毀譽但能驕本等利害但能動適用

呂原明元祐間侍講大雪不能講講孟子有感哲廟一
笑喜爲二絕云水晶宮殿玉花零點綴宮槐卧素
屏特勅下簾延墨客不因風雪廢談經其二曰強
記師承道古先無窮新意出陳編一言有補天顏

動全勝三軍賀凱還

上書鄭谷雪詩為扇賜禁近亂飄僧舍茶煙濕改云輕
飄僧舍茶煙濕云禁中諱危亂傾覆字宮中皆不
敢道着

梅聖俞作試官日登望有春色題於壁云不上樓來今
幾日滿城多少柳絲黃惟歐公一見賞之以為非
聖俞不能韓持國酷愛常蘇州詩如贈孔先生詩
云烏啼春意闌林變夏陰早與蘇州詩云綠陰生
晝寂孤花表春餘相類

梅聖俞舟中送人詩云只恐夜冰合為君愁曉寒荆公
送人詩只應今夜月未便照相思荆公詩有惜別

意孫莘老云杜甫如日長唯鳥雀春暖獨此亦荆言
亂離有深意也得風雅體草黃騏驎病沙曉鶴爲
寒謂祿薄君子不得志世亂兄弟相不見叢篁低地
碧高柳半天青謂君子失時小人得志也返照入
江翻石壁歸雲擁樹失山村老樹飽經霜梅杏半
傳黃腰中一字最工荒庭垂橘袖古屋畫龍蛇甫
因見此而有感也蓋橘袖錫貢龍蛇皆禹之事也
六柳却在御榻上榻上庭前屹相向至尊含笑催
賜金圍人太僕皆惆悵謂小人乘君子之器圍人
太僕養馬者不得賜而爲假馬者得故惆悵也贈
竇侍御詩云與奴白飯馬青芻詩白駒云生芻一

東其人如玉又云言刈其萋言秣其駒敬其奴馬
如此則敬主人可知

神廟愛功荼頻看鏡行藏獨倚樓之句以謂非詩人所
及神廟謂劉巨濟曰作詩者序與意俱盡故云故
作是詩意已盡而語未絕故云而作是詩

蔡君謨守福州上元日令民間一家點燈七盞陳烈作
大燈長夾餘大書云富家一盞燈太倉一粒米貧
家一盞燈父子相對哭風流太守知不知猶恨笙
歌無妙曲君謨見之還與罷燈

張思叔云荆公虎圖詩固好然只是一箇似在杜于美
一句道了青松障子詩云憑軒忽若無丹青是也

杜安世詞云燒殘絳臘淚成痕街鼓報黃昏或譏其黃

昏未到得燒殘絳臘或云荆公尊人作曾有人以

此問之荅曰重簷邃屋簾幕蔽擁不到黃昏已可

以燃燭矣

此詩乃荆公尊人作曾魏公嘗以此責杜杜云乃王某作荆公時在座間語

席

李師中送唐介詩去國一身輕似葉高名千古重於山

又有送詩云好斬佞人頭上血來乞行客酒中杯

筆老人云不若荆公詩衰俗易高名已振險塗難

進學須強

張乖崖詩云兒童不慣錦衣榮見我

歸來夾路迎

不免華山高士笑天真喪盡得虛名一同人石太

學和其韻云四牕滅盡讀書燈牕外唯聞步鐸聲
辜負江山好明月閑來此地趁虛名因拂袖而去
資治通鑑刊成賜執政官及曾預編校者張芸叟以詩
謝純夫云我投湘水五千里公滯周南二十春純
夫和云六世承平有史臣紬書東洛布成均網羅
遺逸三千載筆削興亡十九春天作冠篇墳典大
上思稽古憲章新烏臺御史詞誰校頭白今爲汗

簡人

鄭闕中祭酒闕中先生也年老得請宮祠太學生上書
乞留純夫奏疏引退之留孔戣故事不報公有詩
送闕中云願我言非韓吏部多公節似孔尚書公

稱閔中長者常論邊事閔中先生只是饒人

雅州蒙山常陰雨謂之漏天產茶極佳味如建品純夫
有詩云漏天常洩雨蒙頂半藏雲爲此也

詹竒浦城人至老恬退焚香獨坐常有詩云老骨崢嶸
裘敝皮精神不似少年時一週甲子從新數急速
回頭也是遲

唐人詩主情去三百篇近宋人詩主理去三百篇却遠
矣匪惟作詩也其解詩亦然且舉唐人閨情詩云
裊裊庭前柳青青陌上桑提籠忘采葉昨夜夢漁
陽卽卷耳詩首章之意也又曰鶯啼綠樹深燕語
雕梁晚不省出門行沙場知道遠又曰漁陽千里

道近於中門限中門踰有時漁陽常在眼又云夢
裏分明見關塞不知何路向金微又云妾夢不離
江上水人傳郎在鳳凰山即卷耳詩後章之意也
若如今詩傳解為托言而不以為寄望之詞則卷
耳之詩乃不若唐人作閨情詩之正矣若知其為
思望之詞則詩之寄興深而唐人淺矣若使詩人
九原可作必蒙印可此說耳

古文多倒語如亂之為治擾之為順荒之為定臭之為
香潰之為遂寡之為祥結之為解皆美惡相對之
字而反其義以用之如亂臣十人亂越我家惟以
亂民亂為四方新辟亂為四輔厥亂明我新造邦

丕乃倂亂之類以亂訓治也安擾邦國擾而毅擾
龍六擾之類以擾訓順也荒度土功遂荒大東大
王荒之葛藟荒之以荒訓定也胡臭亶時其臭羶
臭陰達于淵泉以臭訓香也是用不漬于成莫不
漬茂以漬訓遂也將以象鍾以象訓祥也親結其
縞以結訓解也

黃滔律賦如明皇回駕經馬嵬隔句云日慘風悲到玉
顏之死處花愁露泣認朱臉之啼痕褒雲萬疊
新出於啼猿秦樹千層比翼不如於飛鳥景陽井
云理昧納隍處窮泉而詎得誠乖馭朽攀素綬以
胡顏又無名氏作孟嘗君夜度函谷賦嘆秦關之

百二難騁狼心笑齊客之三千不如雞口亦可喜也

古樂府暫出門前楊柳可藏鳥郎作沉木香儂作博山
鑪李白用其意衍爲楊板兒歌曰君歌楊板兒妾
勸新豐酒何許最關情鳥啼白門柳鳥啼隱楊花
君醉留妾家博山鑪中沉香火雙煙一氣凌紫霞
古樂府朝見黃牛暮見黃牛三朝三暮黃牛如故
李白又則云三朝見黃牛三暮行太遲三朝又三
暮不覺鬢成絲古樂府云郎今欲渡畏風波李白
云郎今欲渡緣何事如此風波不可行古樂府云
春風復多情吹我羅裳開李反其意曰春風復無

情吹我夢魂散古人謂李詩出自樂府古選信矣
其揚板兒一篇即暫出白門前之鄭箋也因其拈
用而古樂府之意益顯其妙益見如李光弼將于
儀軍旗幟益精明又如神僧拈佛祖語信口無非
妙道豈生吞義山拆洗杜詩者比乎

王半山文梁王墜馬賈傳自傷門人泚漁曾子垂涕又
詩曰泚漁已悔當年事搏虎方驚此日身泚漁事
出荀子云曾子食魚有餘曰泚之門人曰泚之傷
人不若奧之曾子泣涕曰有異心乎哉傷其聞之
晚也左傳林楚怒馬及衢而駟莊子草木怒生又
說大鵬怒而飛其翼若垂天之雲林希逸曰莊子

連定...詩卷之一
四十一
好用一怒字王介甫詩山木悲鳴水怒流此老善
用古人妙字面

沈約八詠詩登臺望秋月會圃臨春風秋至愍衰草寒
來悲落桐夕行聞夜鶴晨征聽曉鴻解佩去朝市
被褐守山東此詩乃唐五言律之祖也夕夜晨曉
四字似復非復後人決難下也東坡詩朝與鳥鵲
朝夕與牛羊夕三句尤妙亦祖沈意

滇中詩人蘭廷瑞楊林人也予過其家訪其稿僅得數
十首如夏日云終日憑欄對水鷗園林夏長似深
秋槐龍細洒鵝黃雪涼意蕭蕭風滿樓冬夜云
上詩成喜不勝起尋筆硯旋呼燈銀瓶取浸梅花

水已被霜風凍作冰題嫦娥奔月圖曰竊藥私奔
計已窮藥砒應恨洞房空當時射日弓猶在何事
無能近月中三詩皆可喜

陸放翁詩遊山雙不借取水一軍持不借草鞋也言其
價賤不須借也古今注漢文帝履不借以臨朝漢
時已有此名矣軍持瓶也出佛經賈島送僧詩云
我有軍持憑子第岳陽江裏汲寒流

賈島詩長江風送客旅館雨留人二句爲平生之冠而
其全集不載僅見于坡詩注所引

揚誠齋云李太白之詩列于之御風也杜少陵之詩靈
均之乘桂舟駕玉車也無待者神於詩者與有待

而未嘗有待者聖於詩者與宋則東坡似太白山
谷似少陵徐仲車云太白之詩神鷹瞥漢少陵之
詩駿馬絕塵二公之評意同而語亦相近余謂太
白詩仙翁劍客之語少陵詩雅士騷人之詞比之
文太白則史記少陵則漢書也

羅浮山記云望平地樹如薺自是俊語梁戴嵩詩長安
樹如薺用其語也後人翻之益工薛道衡詩遙原
樹若薺遠水舟如葉孟浩然詩天邊樹若薺江畔
洲如月

王維書事詩輕陰閣小雨深院晝慵開坐看蒼苔色欲
上人衣來洪覺範天厨禁籞云此意含不盡之意

子由所謂不帶聲色者也王半山亦有絕句詩意
頗相類按羊山詩云山中十雨兩晴門始開坐
有蒼苔文莫上人衣來蔡正孫編詩林廣記乃以
若耶溪上踏莓苔一首當之謬矣

孟集有到得重陽日還來就菊花之句刻本脫一就字
有擬補者或作醉或作賞或作泛或作對皆不同
後得善本字就字乃知其妙唐詩亦有之崔顥玉
壺清酒就君家李郢詩聞說故園香稻熟片帆歸
去就鱸魚杜工部詩題有秋日泛江就黃家亭子
而古樂府馮子都詩有就我求清酒青絲係玉壺
就我索玳肴金盤鱸魚則前人已道破矣

花開千朵秀雨後萬山青乃琪禪歸垂示僧人之語也
天台如菴主歸隱故山猿鹿為伍郡守聞其風逼
令住持師作偈曰三十年來住此山郡符何事到
林間休將瑣瑣塵寰事換我一生閑又閑焚其廬
去不知所止

寶月禪師云學者無事空言瀕求妙悟去妙悟而事空
言其猶逐臭耳然雖如是罕逢穿耳客多遇刻舟
人一日謂衆曰世緣易染道業難辦汝等勉之

上官道人南平人辟穀煉氣一日偈云處世紅塵五十
八混世獨存今始沒時人若問吾歸處掃盡雲霞
一輪月後戍兵於廣西見之

鄭鑑字子聲將樂人性嗜學攻詩及書畫尤存丹術元至正間出爲教諭與邵武黃鎮成爲友鎮成作詩憶之云能盡能其鄭廣文丹成揮手謝塵氛不知笙鶴遊何處留以瀟湘一片雲

寒食范藏縣重陽菊遠一一聲離岸櫓數點別州山此魏野平陸縣詩也只爲警句而集中不載則野詩散逸亦多矣

黃葉西陂水漫流遠徐風急滯扁舟夕陽暝色來千里人語鷄聲共一丘此寇國寶題吳門寺壁一絕亦可誦

東坡云清吟雜夢寐得句旋已忘固已奇矣晚謫惠州

復出一聯云春風有佳句我醉墮渺莽則又加於少作一等近世詩人老而益嚴未有如東坡者也

近有題公館云好峯層疊暮雲開野老終年未一攀却嘆吳人苦多事四時簫鼓虎丘山此南平尹張水

波詩此公甚有節槩以不習脂膏爲世不取借矣

或問唐宋人詩之別答之曰唐人詩活宋人詩滯唐詩

渾成鏗鏘自在宋詩鋏釘散緩費力唐詩縝密溫

潤宋詩漏逗枯燥唐人詩如貴介公子舉止風流

宋人詩如三家村乍富人盛服揖賓辭容鄙俗唐

人作詩盡一生心力爲之故能名世傳後如吟安

一箇字然斷數莖鬚如何向夜深心從天外歸如

盡日覓不得有時還自來如兩句三年得一吟
澆流如欲識吟詩苦秋霜苦在心如吟成五字句
用破一生成心如纜吟五字句又白幾蓬鬚如蟾蜍
影裏清吟苦解艣舟中白髮生如爲人性僻耽佳
句語不驚人死不休如夜吟晧不休苦吟鬼神愁
如何不自閒心與身爲仇之類是也

史不足信久矣司馬遷不爲紀信立傳陳壽論武侯無
將畧又不爲丁儀立傳劉靜修有詩曰紀錄紛紛
已失真語言輕重在詞臣若將字字論心術恐有
無窮受屈人

葛慶龍詠黃石公云挾書律重大猶光天下嚴搜不敢

藏圮上老人無見者一編親寫授張良

又題筇杖云白髮慵巾短短衣閑行斜倚小筇枝
自家弄影猶痴絕只似初騎竹馬時

楊白湖詩曰東坡但願生兒蠢只爲聰明自占多愧我
平生愚且蠢生兒何怕過東坡

有朝士還鄉鼓吹甚都執友誦孫鳳洲贈圭齋詩曰圭
齋還是舊圭齋不帶步兒官樣回若使他人居二
品門前簫鼓鬧如雷

有人作大字刺嘲之以詩曰諸葛大名垂宇宙今人名
大欲如何雖於事體無妨碍只恐文房費墨多

巖滄浪題北風云夜來雨雪北風顛吹得波濤欲暗天

世上如今少知己煩君牢繫釣魚艇

梅先生聞丐詩云忽聞貧者乞聲哀風雨更深去復來
多少豪家方夜飲貪歡未許暫停杯此與前輩
婦吟子規啼徹四更時起視蠶稠怕葉稀不信樓
頭楊柳月玉人歌舞未曾歸

近有人題出塞曲云萬里提戈搗虜營十年辛苦障邊
城生來不是封侯相血漸長安陌上塵

元末江西程國儒任餘姚州判官因亂來依方谷珍與
呂玄英爲友國儒有鶴傍牡丹圖索呂題云牡丹
花畔鶴精神飛並雲林似倚人萬里青霄不歸去
洛陽能有幾時春程得詩即日促裝回鄱陽

岳武穆王墓在杭州棲霞嶺王之子雲祔馬墳廟傾圮
田沒於人元李全經歷杭府與鄭元祐作疏白請
興廢云方畧如霍嫫姚不逢漢武徒結志於亡家
意氣如祖豫州乃遇晉元空誓言於擊楫棲霞嶺
下秋水觀西落日鼓鍾長爲聲寃於草木空山香
火猶將薦莢於淵泉豈期春秋無所烝嘗風雨遂
頽廟貌休馳夜啼拱木躑躅春開斷垣名人佳客
吊詩固多如潘子素先生純云海門寒日澹無暉
偃月堂深晝漏遲萬竈貔貅江上老兩宮環珮夢中
歸內園羯鼓催花發小殿珠簾看雪飛不道帳前
胡掀擁有人行酒看青衣林清源先生泉生云誰

收將骨殖西湖已卜他年必沼吳孤塚有人來下
馬六陵無樹可棲烏廟堂短計慚嫠婦宇宙惟公
是丈夫往事重觀如敗局一龕燈火屬浮屠高則
誠先生明云孤臣尚有埋身地二帝遊魂更可悲
葉靖逸先生紹翁云如公少緩須臾死此虜安能
八十年皆忠壯激烈讀之墮淚近特如莆陽林見
素先生俊云十二牌來馬鞍郟城狼狽泣相從中
原赤手經營外底事書生蚤料中大將幾看刑白
馬諸君無分飲黃龍播遷竟沮奸臣計吹落厓山
此夜風則又追前作而抗軼之矣孫太白山人一
元云誓死從來建大勳長驅虎旅破妖氛中原故

舊今餘幾四海相看獨有君
吾道千年元氣在
皇圖萬里一江分
至今風斷黃龍府
鐵馬猶嘶戰後雲亦傑作也

紫陽楊煥然先生讀通鑑至論漢魏正閏大不平作詩云風煙慘淡駐三巴漢燼將燃蜀婦髻欲起溫公問書法武侯入寇寇誰家

元昊思誠先生未及第時晨炊不繼欲携布袍質米於人室氏有吝色戲作一詩曰典却春衫辦早厨老妻何必更躑躅瓶中有醋堪燒菜囊裏無錢莫買魚不敢妄爲夢子事只因曾讀數行書嚴霜烈日皆經過次第春風到草廬

唐德宗制誥闕人帝曰與韓翃時有同姓名中書具二人同進帝書詩云春城無處不飛花寒食東風御柳斜日暮漢宮傳蠟燭青烟散入五侯家末批云與此韓翃

杭州吳山丁野鶴仙昇于紫陽洞菴舊傳丁葉家爲全真道士一日召其妻王守素入山書四句付之云嬾散六十三妙用無人識逆順俱兩忘虛空鎮帝寂坐抱一膝而逝方外謂之騎鶴化守素亦束髮簪冠着道士服奉夫遺屍一十年迹不下山元進士薩都刺天錫有詩曰不見遼東丁今威舊遊城郭昔人非鏡中春去青鸞老華表山空白鶴歸石竹

淚乾斑雨在玉簫聲斷彩雲飛洞門花落無人迹
獨坐蒼苔補道衣辛丑丁未至其地見一卷中
野鶴遺像在焉無所謂遺屍意或在懸崖絕頂覓
其處所後人特於此祀之矣

洞庭劉氏寄衣於都門與夫葉正甫詩云情同牛女隔
天河又喜秋來得一過歲歲寄郎身上服絲絲是
妾手中梭剪聲自覺和腸斷線脚那能抵淚多長
短只依先去樣不知肥瘦近如何

陳白沙先生唱道東南頗自尊有一士人投刺往見
白沙拒之其人大書廳壁云考亭亭下蹟荒蕪野
鳥山中獨自呼欲向白沙問真處魯人曾笑宋人

愚書至遂去向沙清恨恨不已追之不及

白沙題湖州韓文公祠云刺史文章天下無海中靈物識之乎可憐甫李生人世不及滄洲一墨魚

毘陵有一女姓李年十六歲能詩破鏡詩云半輪殘月
揄塵埃依稀猶有闌元字想得清光未破時買盡
人間不平事

劉攽之挽張魏公一絕云背水未成韓信陣明星已隕
武侯軍平生一點不平氣化作祝融峯上雲

蔣復軒鑷白髮詩云勸君休鑷鬢毛斑鬢到班時已自
難多少朱門少年子業風吹上北邙山

馬自然題杭州秦望山詩曰太一初分何處尋空留歷

道林曰：言詩卷之一
數變人心。九天日月移朝暮，萬里山川自古今。風動水光香遠徹，雨添嵐氣沒高林。秦皇謾作驅山計，滄海茫茫轉更深。

有僧因人欲攘其山，廼掛草鞋一雙於方丈。詩云：方丈前頭掛草鞋，流行坎止任安排。老僧鞋底從來濶，未必骷髏就此埋。可爲解龜之法。

杜詩云：莫笑田家老瓦盆，自從盛酒長兒孫。傾銀注玉驚人眼，共醉終朝卧竹根。傾銀注玉，只言酒也。論田家樂趣，非如傾銀壺。注玉，孟之云。

唐司空圖書云：昨日流鶯今日蟬，起來又是夕陽天。六龍飛總長相窘，更忍乘危自着鞭。戒好色自戒者。

也

揚與立谿頭詩云谿頭石磴坐盤桓時見脩鱗徃復還
可是水深魚極樂不須妄意要垂竿有道之言意
象自別還竿非韻不論

王元章勸農詩云雲擁旌旗出翠微勸農五馬夜歸遲
年年祇把親耕語說與山光水色知于介翁和之
云同井分田古意微租庸遺法亦凌遲欲耕多是
無田者試問使君知不知

樊時中參政浙江觀潮詩云煙波閃閃海門開平地潛
生萬壑雷大信不虧天不老浙江亭上看潮來公
之志可見矣

揚玠尚書致仕舊居爲人侵占有詩云四隣侵我我從
伊畢竟須思未有時試上含光殿基望秋風秋草

正離離

揚廉夫見元朝以酒衣賜張士誠遂作詩云江南歲歲
烽烟起海上年年御酒來如此烽烟如此酒老夫
懷抱幾時開

焚書坑在驪山下即坑儒谷有人云焚書祇是要人愚
人未愚時國已墟惟有一人愚不得又從黃石讀
兵書

劉草窓溥題揚邊帥白鵲詩云早隨金印出邊州晚送
權聲入御樓剪取白羅飛繡幕旗竿十丈掛胡頭

宋李文正公昉嘗言其座主王仁裕懸一詩于客次云
二百一十四門生春風初長羽毛成擲金換得天
邊桂鑿壁偷將榜上名何幸不才逢聖世偶將疎
網罩群英衰翁漸老兒孫小異日誰知畧有情觀
此座主門生重且厚矣

僧言佛子在西空道說蓬萊住海東惟有孔門真實事
眼前無日不春風此詩云是回回教門作彼之俗
惟敬一天字

莊定山賦曾節婦詩曰二十夫君棄妾身諸郎痴小舅
姑貧自傷薄命同衰葉不掃蛾眉嫁別人化石未
成猶有淚舞鸞雖在不驚塵鎖囚獨對東風樹歲

歲花開他自春苦心苦語可泣鬼神

幾樹甘棠種未成使君何事苦經營雷霆怒擊水山碎
只恐錢神也不靈此紫姑仙降筆箴一大守携賂
入京求陞詩也鬼亦靈也哉

張東海過蘇步坊云東坡昔日此闢行此地遂留蘇步
名何事章惇瘞毛骨子孫羞認是先塋郡二泉挽
張東海云張公不作南安守浪說文章只潤身滿
地棠陰棺蓋後忌公人是愛公人

農家壁上四絕意甚警策或曰晦翁詩

鵲噪未爲吉鴉鳴豈是凶人間凶與吉不在鳥音
中耕牛無宿食倉鼠有餘糧萬事分已定浮生空

自忙翠死因毛貴龜亡焦殼靈不如無用物安樂
過平生雀啄復四顧燕窠無二心量大福亦大機
深禍亦深

天台陳劄中題范增墓云七十衰翁兩鬢霜西來一咲
火咸陽平生奇計無他事只勸鴻門殺漢王題博
浪沙云一擊沙中膽氣高祖龍社稷已驚搖如何
十二金人外猶有民間鐵未消二詩豪邁出人意
外

趙東山口占鋸匠解木云一條黑路兩人忙傍晚相看
鬢有霜你去我來何日了虧他扯拽度時光

元朝將采男女民間年十二三以上便婚嫁有口占絕

海東甲第詩話卷之一
句云一封丹詔未爲真三盃淡酒便成親夜來明月樓頭望惟有姮娥不嫁人

沈石田一日將遊金陵其友人選以詩云丈人安得守茅茨獨上金陵看絕奇爲語鳳凰臺上客有人來

和謫仙詩

有人題張果老倒騎驢圖云世間多少人無如此老漢不是倒騎驢萬事回頭看

張志道題爛柯山圖云人說仙家日月遲仙家日月轉堪悲誰將百歲人間事只換山中一局棋

有一士人見人以張巡傳糊窓題云坐守睢陽當豹關江淮賴此得全安至今青史雖零落猶障窓風一

面寒

真西山帥長沙宴十二邑宰於湘江亭作詩曰從來官
吏與斯民本是同胞一體親既以脂膏供爾祿須
知痛痒切吾身此邦素號唐朝古我輩當如漢吏
循今日湘亭一杯酒便煩散作十分春

米元章爲雍丘令捕蝗鄰縣亦多或言緣雍丘驅逐移
文牒至元章大笑書其後云蝗虫元是飛空物天
遣來爲百姓災本縣若還驅得去貴司却請打回
來

江丞相古心知吉州遇上元放燈同樂兩作有士人投
詩云隱隱雷聲天鼓鳴熒熒燈火夜星辰風流大

守明如鏡何用姮娥作主人後古心攻除江西漕
使舟經臨江風濤大作索紙筆書云萬里爲官徹
底清舟中行止甚分明如今若有虧心事一任碧
波深處沉

宋末宮中好養鶴太學諸生題之曰萬鶴盤旋遠帝都
暮收朝放費工夫何如養取南來鴈沙漠能傳一

聖書

龍麟洲賦琵琶亭譏呂文煥詩曰老大蛾眉負所天忍
將離怨付哀絃夜深正好看明月却抱琵琶過別
船

張伯雨題趙仲穆墨蘭詩曰滋蘭九畹空多種何似墨

池三雨花近日國香零落盡王孫芳草遍天涯

李東陽爲首相有士人投以詩云才名直與斗山齊伴
食中書日已西回首湘江春草碧鷓鴣啼罷子規

啼

東坡朱陳村嫁娶圖云我是朱陳舊使君勸農曾入杏
花村而今風雨那堪画縣吏催錢夜打門則非樂
天所云縣遠官事少上深民俗淳之舊矣

曼正夫過彭澤詩曰縣樓寂寂枕江聲五里荒山二里
城彭澤到今更幾令縣人開口說淵明

裘萬頃不樂仕進詩云新築書堂壁未乾馬蹄催我上
長安兒時只道爲官好老去方知行路難千里關

山千里念一番風雨一番寒何如靜坐茅齋下翠
竹蒼梧仔細看

揚與立幽居詩云柴門閑寂少人過盡日觀書口自哦
餘地不妨添竹木放教啼鳥往來多

沈文卿貧而讀書被盜反贈以詩曰風寒月黑夜迢迢
孤負勞心此一遭只有古書三四束也堪將去教
兒曹

天台宋氏家本富後貧鬻廬於隣價成作詩曰自歎年
來剝骨貧吾廬今已屬西隣殷勤說與東園柳他
日相逢是路人

有題呂洞賓飛吟亭云覓官千里赴神京鍾老相傳

使傾未必無心唐事茶金丹一粒誤先生

王梅溪勉邑宰云九重天子愛民深令尹且懷惻隱心
今日黃堂一杯酒使君端爲庶民斟

宋仇萬頃敏捷能詩有人以空牋紙求題止有蓋鴈即
書六六葉蘆秋水裏兩三箇鴈夕陽邊青天萬里
渾無碍衝破寒潭一抹烟

張耒厓自成都召還華山寄陳搏詩云世人大抵重官
榮見我西歸夾路迎應彼華山高士笑天真喪盡
得浮名

日本僧咏西湖曰昔年曾見畫湖圖不意人間有此湖
今日却從湖上過畫工猶自欠工夫

寇萊公富貴作詩多凄楚愁怨如曰杳杳烟波隔千里
白蘋香散東風起日落汀洲一望時愁情不斷如

春水

餘干胡敬齋題詩孺子祠曰漢豎紛紛不可爲先生明
哲已先知如何不把幾微事說向陳蕃下榻時

靖難師至齊黃方練死馬有人賦詩云一箇忠成九族
殃全身遠害亦天常夷齊死後君臣薄力爲君王
固首陽

世間惟有征夫苦天下無如邊塞寒髮爲胡笳吹作雪
心因烽火煉成丹此威寧伯王越行邊詩也其人
雖有權譎而于邊徼險易虜情真偽將士強弱勞

逸出奇取捷顛倒才智而言官劾其生事開邊僥
爵家食居今之世全才固難而用才尤難也

羅編脩一奉之貶雖時相李賢而爲之畫策者學士陳
文也文死薛之綱御史挽之曰學士先生早蓋棺
薤歌聲裏路人歡填門客散名猶在負郭田多死
亦安菹井已非今日利冰山不似舊時寒九原若
見南陽李爲道羅倫已復官

虎告相公聽我歌相公比我食人多相公若肯行仁政
我自雙雙北渡河此士人愈珩賀仁和大尹獲虎
詩也余宅憂時親見縣尹以一石米庫役之差而
敗三家竒求滿橐而巡察者反以材能目之嗚呼

斯民太平之無日矣比虎食多豈無驗之言哉

茅大方寄淮南守將梅啟詩曰淮南消息近如何聞道
將軍志不磨縱有火龍燔地軸莫教鐵騎渡天河
關中事業蕭丞相塞上功名馬伏波老我不才無
補報臨風一嘆一長歌

寧海典史魏澤過方孝孺故居云荀輿衝雨過侯城撫
景令人感慨生黃鳥向人空百轉清猿隨泪况三
聲山中自可全高節天下難居是盛名却意令感
千載後重歸華表不勝情

江風夜夜鼓洪波江雨朝朝濕薜蘿九辨不回哀郢志
三軍難奪採薇歌手披宿草孤踪滿夢轉空梁月

影多誰謂百年臣子恨獨聞野老淚滂沱此楊福
禮堊黃給事鉞而吊之以詩也

黃子澄因李景隆敗衄不誅撫膺大慟曰大事去矣賦
一詩志痛云仗鉞曾登大將壇貂裘遠賜朔方寒
出師無律真兒戲負國全身獨汝安論將每時悲
趙括攘夷何日見齊桓尚方有劍憑誰借哭向蒼
天幾墮冠景隆乃李文忠之子故以趙括斥之

沛縣尹顏伯瑋題詩御史臺壁云太守諸公監此情只
因國難未能平丹心不改人臣節青史誰書縣尹
名一木豈能支大廈三軍空復築長城吾徒雖死
終無恨望采民艱達聖明南向再拜自經死廬陵

揚文貞公過沛悼以詩曰平生金石見臨危就義
從容子亦隨千載山河遺縣在一門忠義我史官知
故鄉住近文丞相先德傳從魯太師欲耐荒墳何
處是離離芳草泪空垂

呂氏肅明西漢呂氏
魚羅隱題蟠溪垂釣圖曰呂望當年展廟謨直鈞釣國更

誰如若教生在西湖上也是須供使宅魚武肅嘆
獨其征可謂微而諷者矣

籃裏無魚欠酒錢酒家門外繫漁船幾回歌脫箬衣當
又恐明朝是兩天此蜀僧賦漁翁以荅賈似道也
其詩洒然可誦

刺血抄經柰若何十年依舊一頭陀袈裟未着言多事

着了袈裟事更多此揚廷秀贈抄經頭陀詩也筮
仕解褐亦可以此爲規

同一狀元也文文山天祥死焉留中齋亭炎止附後自
北歸嚴陵就養於其子府判者何潛齋遺之詩曰
昆明灰劫化虛縗功名恣一炊鍾子不將南
操變庾公空抱北臣悲歸來眼底湖山在老去心
期浙水知白髮門生憐未死青衫留得裏遺屍

韓侂胄宴南園有人獻牽絲傀儡爲土偶負小兒者名
迎春黃胖韓顧族子判院賦詩即承命云脚踏虛
空手弄春一人頭上要安身忽然綫斷兒童手骨
肉都爲陌上塵韓大不樂未幾袖作

嚴州壽昌縣道旁有朱買正廟有人題詩云貧賤難堪
俗眼底區區何事便雲泥會稽乞得無他念祇爲
歸來說故妻又云采薪行道自歌呼越俗安知有
丈夫一見印章驚欲倒相看方悔太模糊二詩所
刺不同

唐李涉過皖口遇豪者持兵過艦乞詩涉贈一絕云暮
雨蕭蕭江上村綠林豪客夜知聞相逢不用相迴
避世上于今半是君讀此可閱世變

明之慶安寺前有古松夾道奇蔭數里寺後有泉出深
谷僧以巨竹連筒引分于松下石池中舒亶有詩
云門前屏障遠潺湲溪竹與林僧夜定還松蓋作雲

遊十里竹籠行兩出千山白公香火蓮開後謝氏
池塘草夢間我亦鳳凰臺上客圖開却笑未能開
模寫景物殆盡

收拾乾坤一擔擔上肩容易下有難勸君高着擎天手
多少傍人冷眼看此士人上賈似道入相詩也劉
伯溫曰宰相者持心如水以義理爲權衡而已無
與焉揚憲汪廣洋雖不可謂無才皆無相器卒以
覆敗况意氣卑弱心術貪伎之人當此大任無敗
得乎用人者拘之以資格循之以品第難保其不
患得患失上世耕野釣渭之意既微而退居下僚
身老不用治平之學無自表見矣

王欽若守杭州一錢塘尉蒼髯白髮乃公同年進士憐而薦之以詩申謝曰當年同試大明宮文字雖同命不同我作尉曹君作相東君元沒兩般風

李適之罷相作詩曰避賢初罷相樂聖且啣杯爲問門前客今朝幾箇來蓋炎附寒棄從古然矣灌夫不負寶嬰於擯棄之時任安不負衛青於衰落之日徐晦越鄉而別館賀后山出境而見東坡宜其纏千載之齒頰也

盡日尋春不見春芒屨踏遍隴頭雲歸來笑撚梅花嗅春在枝頭已十分此尼詩也脫洒可喜悟道之言也

庶吉士鄒公智星變抗章斥宦官下獄其寫懷曰人到
白頭終是盡事垂青史定誰真夢中不識身猶繫
又逐東風入紫宸其辭朝曰盡披肝膽知何日望
見衣裳只此時但愿太平無一事派臣萬死更何
悲

霜落風高恣所如歸期回首是春初上林天子援弓繳
窮海纍臣有帛書元郝文忠公經帛書詩也鴈能
傳書不誣矣

僧問達觀穎禪師云如何是向去底人師曰從歸青嶂
裏不出白雲來云如何是却來底人師曰自從遊
紫陌誰肯隱青山云如何是奪人不奪境師曰家

蓮花日錄卷之二
裏已無回日信路邊空有望鄉牌云如何是奪境
不奪人師曰滄海盡教枯到底青山直得碾爲塵
云如何是人境兩俱奪師曰天地尚空秦日月山
河不見漢君臣云如何是人境俱不奪師曰鶯囀
千林花滿地客遊三月草侵天

洞山和尚問師曰如何是主中賓師曰青山覆白雲曰
如何是賓中主師曰長年不出戶曰賓主相去幾
何師曰長江水上波曰賓主相見有何言說師曰
清風拂日月洞山辭退師乃述偈曰三間茅屋從
來住一道神光萬境閑莫犯是非來辨我浮生穿
鑿不相關

近有箕筆降云是巫山神女郎大書曰我是巫山正立
神襄王與我有何因自從宋玉悲秋後萬古湘流
洗不清則古人裝點詞賦而後人以假爲真者豈
但此哉

元厚之絳平生嗜富貴不喜外補及以給事領長樂親
舊祖道多以東陶百貨永嘉之楫烏石荔子珍絕
天下絳下車作詩謝之云丹荔黃楫北苑茶勞君
誘我向天涯爭如太液池邊看池北池南總是花
則重內輕外在昔已然矣

邵京實閩人務學尚隱所交皆一時清雅惜其唱和散
逸惟鍾明德題京實山居十六詠內巫頂飛雲詩

云白雲飛去山色深白雲飛歸山色陰時來時去
自古今山亦無語雲無心有人結廬占巫頂白石
支頭卧雲影清霄雲起隨飛龍行雨歸來人未醒
世傳宋真宗神宗哲宗皆武夷君應世建守陳覺民常
有詩云昇真洞口接天門靈草丹桃日日春聽說
列仙來瑞世三朝德業在斯民

章子厚罷相過南山寺有僧奉忠子厚不爲禮倚檻看
雲曰夏雲多奇峯真善比類僧曰曾有一詩甚奇
如峯如火復如綿飛過微陰落檻前大地山河乳
欲死不成霖雨漫遮天有譏意子厚默然

泉州守臣滿壽庚拒宋益廣二王殺諸宗室帝移潮州

納欵于元壽庚武人其計皆山於元壽歲所畫決
策既定佯著黃冠野服隱山中自稱處士不臣二
姓之意忽二書生求謁索紙筆題詩其一曰梅花
澹地點蒼苔天意商量要入梅峽蝶不知春去也
雙雙飛過粉牆來其一曰劍戟紛紛扶主日山林
寂寞閉門時水聲禽語皆時事莫道山翁惣不知
書畢拂袖壽歲得詩惶汗失措遣人追之竟不復
見

方惟深字子通隱居不仕嘗吟古栢云四邊喬木盡兒
孫曾見吳宮幾度春若使當時成大厦也應隨例
作埃塵又行舟詩湍流怪石礙通津一一操舟若

遠志 詩話卷之一
有神自是世間無妙手古來何事不由人又晚泊
云客帆收浦月黃昏野店無燈欲閉門半出岸河
楓欲死繫舟猶有去年痕王荊公大愛之

或有稱詠松之句影搖千尺龍蛇動聲撼半天風雨寒
者一僧在座曰未若雲影亂鋪地濤聲寒在空或
以語聖俞聖俞曰言簡而意不遺當以僧語爲優
宋陳彥才與時相同庚但日少差有薦陳者但注邑連
江陳戲作一詩云命賤安能比鉅公偶然年月與
時同只因日上差夢子笑向連江作醉翁

宋朝頃年多事郡縣不頒曆所至晦朔不同朱希真避
地廣中作小盡行云藤州三月作小盡梧州三月

作大盡哀哉官曆今不頒憶昔升平淚成陣我今
何異桃源人落葉爲秋花作春但恨未能與世隔
時聞喪亂空傷神嗚呼時事如此尚忍言哉

世之箕仙亦有可信者予辛丑年冬請一箕仙云千林
搖落晚風寒萬里長空眼界寬拂石坐來清興發
高山流水爲誰彈予方有綠珠之擇遽降詩云乙
酉年來是子時平平穩穩却無疑一段良緣君可
就管教繼續百年期予問以進士消息則云玉環
龍首語音容象管歌喉樂更濃甲第此時端的分
似疑天府下攀龍前二句則嘲予末二句分明露
出甲辰二字

東坡挾妓登金山以酒醉佛印戲命妓同卧印醒書壁
云夜來酒醉上床眠不覺琵琶在枕邊傳語翰林
蘇學士不曾彈動一條絃

金山當京口之衝騷人墨士遊無虛日焦山僻處下流
人迹罕到坡云金山樓觀何兢兢撞鍾擊鼓聞淮
南焦山何有有脩竹采薪汲水僧兩三其後梵宇
浸盛與金山並勝金山亭曰吞海而焦山亭曰汲
江示兩山對峙江中不相上下也

蜀峽踞間有溪曰韓溪乃蕭相國追韓淮陰處也劉涇
題一絕云豪傑相從意氣中憐才傾倒獨蕭公後
來可是無奇客東閣投名尚不通嗚呼士貴士賤

固自有時抑或求人求於人者有不同耶

宋王十朋因太白晝見詩曰煌煌太白生東方追逐殘

月生光芒太陽中天不肯藏過午一點猶微茫太
史占之此何祥感憂兵起人流亡金行用事多災
傷大風地震水旱蝗有一于此宜預防雜然並見
何以當臣言天意未可量滔天赤地共堯湯偃禾
拔木悟成王宋景一言國乃昌災異不作憂楚莊
吾皇脩德應彼蒼去讒遠佞任忠良推誠納諫正
紀綱內脩政事仍外攘誓雪國耻還封疆強虜當
弱吾當強天戒爲福非爲殃願勿徒以虛文攘其
忠愛之意中心達於面目

謝疊山作五星詩云五緯煌煌聚在秦項王稱霸沛公
臣誰知四百年天下已屬寬仁大度人

坐見茅齋一葉秋小山叢桂鳥聲幽不知疊障夜來雨
清曉石楠花亂流狀霽後景物不凡也或云司馬
才叔作

東都周默未嘗作東一日設席請客時久旱忽風雨交
作宋溫戲作詩曰驕陽爲戾已成災賴有開筵周
秀才莫道上天無感應故教風雨一齊來客哄然
一笑

舊傳太守因旱祈雨於龍潭得小雨而未應因作一絕
云祈雨精神尚未通浮雲開闔有無中潭龍恐我

羞歸去畧洒步步表不空因寫詩投潭中繼卽大雨隨至

榮陽公謫居閉戶却掃不交人物嘗作詩云老讀文書興易闡須知養性不如閑竹床瓦枕虛堂上卧看江南雨後山元符末起知單州登城樓作詩云斷霞孤鷺欲寒天無復青山礙目前世路崎嶇飽經歷始知平地是神仙

毛國英澤民之子也以詩自鳴嘗經岳侯駐兵之地江禁方嚴國英投詩云鐵鎖沉沉截碧江風旗獵獵駐危檣禹門縱使高千尺放過蛟龍也不妨侯曰詩人也委舟渡之

護口之禍可畏蔡持正作詩云紙屏石枕竹方床手倦
拋書午夢長睡起茫然成獨笑數聲漁唱在滄浪
人遂云蔡確此時獨笑何事又有詩云孤臣正泣
龍鬚草遊子空簪鳳尾花後被監司指此句爲罪
言旣不得笑又不得泣此豈盛時之事近有奸人
指詩求脫罪罟而穆王湘女之句禍烈縉紳雖究
竟昭雪而作詩之禍不但一蘇子瞻可畏也哉

有一人與一士人園相近百計取之而不可得一日壽
一契送之云乾坤到處是吾亭機械從來未必真
覆雨翻雲成底事清風明月冷看人蘭亭禊事今
非晉挑洞神仙也笑秦園是主人身是客問君還

有幾年身既得詩不敢受園即日還之

唐末撫州刺史禁汝水放生池採捕忽有人垂釣邏者捕之釣者口號云投却長竿捲却絲手携蓑笠賦新詩臨川太守清如鏡不是漁人下釣時刺史釋之

雪壓喬林凍未開始知天意欲春回雪中未問和羹事先向百花頭上開此王沂公梅詩也呂文穆公見之曰此已安排狀元宰相矣後果然

王荊公詠竹云人怜直節生來瘦自許高材老更剛曾與蒿藜同雨露終隨松柏到風霜慈溪黃氏震曰此詩見其自少抱負不凡近又有人詠竹云未出

土時先有節到凌雲處亦無心

歐陽公守滁陽蒸醒心醉翁二亭相琅琊幽谷命慕容
謝判襍植花卉其間諭以狀問名品公即以一絕
句書其紙尾云淺深紅白宜相間先後仍須次第
裁我欲四時携酒去莫教一日不花開

有客宿湘妃廟前夜半偶不寐見輿衛入廟中置酒鼓
琴心悸不敢窺迨明方散隱隱絕水浮空而去因
入廟中見壁上墨猶未乾詩云碧杜紅蘅縹緲香
水絲揮月弄新涼峯巒向曉渾相似九處堪疑九
斷腸神怪不足言但詩殊佳也

有人題夢筆驛云一霄短夢驚流俗千載高名掛里閭

遂使晚生於此意痴眠不讀一行書此亦足驚後學者之虛誕不學而付於悠悠之一夢也

白樂天絕句云試問池臺主多爲將相官終身不曾到惟展畫圖看此言富貴之人當知止足之義而勿爲身後之悔也

戴石屏織女詩云春蠶成絲復成絹養得夏蠶重剝繭
絹未脫軸擬輸官繭未脫車圖贖典一春一夏爲
蠶忙織婦布衣仍布裳有布待着猶自可今年無
麻愁殺人詩語盡而愁意無盡可與聶夷中詩並
看

韓魏公琦晝寢士人李清臣來謁門者不報辭以方寢

清臣遂題其壁云公子乘閑卧絳厨白衣老吏慢
寒儒不知夢見周公否曾說當年吐哺無魏公使
人慰之以其兄子妻之魏公之下士清臣之自直
今皆不可得而見矣

則天延載元年嵩山人韋什方自云吳赤烏元年生自
言二百年以妖妄惑衆則天遂賜姓武氏僧懷義
得幸於天后費財耗國度力士爲僧千人姦謀萬
狀多居白馬寺詩云經來白馬寺僧到赤烏年釋
氏之熾於中國豈聖明之世哉

宋江都陳良與子景山同登進士良孝念親不逮嘆曰
先子力學起家今墓木已拱而予方登第不及景

山遠耳有詩云自漸不及吾兒甚得向親前說
衣

李東陽跋胡廣所集文山事蹟曰狀元忠義古今傳野
史何如舊史全剛述總煩胡學士姓名猶記丙申
年其意微而婉讀者自得之

葉少蘊云鄉有老儒方深字子通能詩用意精苦所居
陋巷終日閉門有詩思步行其中引手瞑目如與
人語或穴中搏拏跳躍故人謂之方鬼子通嘗徑
造一園亭不遇主人自盤礴終日因題詩云何年
兀突庭前石昔日何人種松栢乘興閒來就榻眠
一枕清風君莫惜城西今古陽山色城中誰有千

年宅來去何須問主人自是亭中客其洒落
如此釋仲殊一日訪子通留詩云多年不見玉川
翁今日相逢小樹東依舊青氈無長物只餘松檜
養秋風可見其清簡云

有僧名規者年七十談論蕭散有詩曰讀書已覺眉稜
重就枕方欣骨節和睡起不知天早晚西窓殘日
已無多真所謂日午山僧眠未醒筭來名利不如
閒誠哉

江羅亭仙姬訪西子陳迹古歌曰吳王舊國水烟空香
逕無人蘭葉紅春色似憐歌舞也年年先發館娃
宮又曰舊老芳臺楊柳新菱歌清唱不勝春只今

惟有西江月曾照吳王宮裡人又曰家國興亡來
有以吳人何苦怨西施西施若解亡吳國越國亡
來又是誰末又歌曰家是江羅亭上仙謫來塵世
已多年君心既逐東流水錯把無緣當有緣敬畢
躍入水中去

僧琳號無畏好學能詩常創無畏菴有松合抱郡將治
鈴齋素材欲往伐之琳知之預命削松皮題詩其
上云大夫去作棟梁材無復清陰護綠苔只恐夜
深明月下誤他千里鶴飛來縣尉讀其詩而止

林見素公征西成功隨乞休致蓋見幾而作不俟終日
李夢陽寄以詩云錦水啼鶯起巴山春望微干戈

滿眼急江漢再歸遲花送琴書色霜留斧鉞威所
傷豺虎亂公也惜鷗機又云諸葛能安蜀穰苴本
善兵向來優起詔翻作急流行老益丹心壯憂惟
白髮驚獨於川父老涕泣挽歸旌

八十耆年一品官歸來清節雪霜寒雖然海內歸心在
可柰君前下拜參鷗鷺恐疑威鳳起風雲長護老
龍蟠三公事秦三槐侍留取完名久遠看此秦左
史強景明上王三原公詩也公之勇退固不輕就
但景明亦魏野之流也

呂用之起延和閣綺恩繡力殆非人世焚香列寶以祈
王母之至及師鐸亂人方及登之見二十八字於

高閣藻井垂蓮之上云延和高閣上千雲小語
疑太乙聞燒盡降真無一事開門延得畢將軍此
近詩妖也

小秦王詩三首其一云鴈門山上雁初飛馬邑關中馬
正肥陌上朝來逢驛騎殷勤南北送征衣其二云
柳條金嫩不勝鴉青粉墻頭道韞家燕子不來春
寂寞小窓和雨夢梨花其三云十指纖纖玉笋紅
鴈行輕度翠絃中分明自說長城苦水咽雲寒一
夜風第一首效女盛小叢作後二首無名氏

蓬窓日錄卷之七